

INYUMBA MAHAME

TUVUYE KHUNYUMBA

GASTOR MWEVE MTOTOWAKHASI

Litolelu Iya khwanja 2023

Copyright © 2023

Gastor Mtweve Mtotowakhasi

mnyahula@gmail.com

Uduti, Mlangali, Ludewa, Njombe

ISBN 978 9912 9935 9 4

©Ikhitabu khisiluhusiwa ukhuyandikha, ukhutengenesa, ukhukucha ama ukhukavila vanu bila khupata uluhusa khwa muyandisi.

Kekavelemwe

Kekavelemwe.....	iii
Ndidalicha	viii
Vutengulilo.....	ix
1. Ngotola.....	1
2. Inyi Yihele.....	3
3. Dinde Ulwichi	5
4. Mswamu Nyamalongo	6
5. Suluvali Nyene.....	7
6. Sandukha.....	9
7. Khupakala	10
8. Matambiko.....	11
9. Fideke Fyana	13
10. Nyumba Madinda	15

*Kwa Vapangwa voti na yeyoha yeitanga
ukhutunja imila cha vapangwa*

Ndidalicha

Ikhithabu ikhi ngali khisiyandikhilwe khulekha vanu volofu kuhuma na kutangilanila. Ndidalicha khwanja khwa Nguluvi khwa khunivikha mumi mbakhi lelu. Yumwene amelye uvumanyi vwa khuyandikha nukhuleta muinyi yetu ikhithabu ikhi.

Ndidalicha khwa familiya yangu yondi. Khwa khuva pamwinga nani wakati woti pendatingilwe khukhusanya amachu na khuyandika. Pangapo nditumilike umuda kwa khuva navene khwene khuyandika. Khulutila uvushauli na machu kakhunipela ingufu, vanangile ukhumala khuyandikha ikhithabu.

Khuhumila ndisaliwa mbakha ilelu, khunya vanu volofu nechuvanitangile. Ndidalicha khwa woti yevanitangile khwa njila yoyoti khufika pendivele ilelu. Unguluvi avavikhake.

Mdalikhe nechuv. Ndifukafuka.

Vutengulilo

Unguluvi yeakhatuvumbile nukhutulimba pa inyi ya vapangwa, alondaka tubabake nukhuyendelesa iinyi ya mwene. Ilonda uvupangwa vuyendelelake mbakha peya iyicha. Lakhini khweyibita iinyi, tuvangile ukhuyacha uvutambulisu wetu ngita vapangwa. Avafijana vapindilwe na mapululu ka vusasa mbakha khuva vapangwa vivona soni. Vinyilanyila na khusakhanya amaendeleu ka ng'aning'ani bila khulola ikalama yakhe. Khwakulutila amachu ako, muyandisi ichile nu mukoda kwa khutanga khukomosa avapangwa khunyumba. Avapangwa vakomokhe khuvupangwa.

Umuyandisi ichile ni visimo fyefitumye uvushayili vyevupangilwe mumatafya ka khipangwa. Ivisimo fya mukati fiyicha khutunja injovele ni mila cha vapangwa. Umuyandisi alongelye finu fyefyahumye na fyefihumila painyi ya vapangwa. Finu fyefilongelilwe filimbilwe khukhumbucha amatafya tofauti ngita; vanu khukhumbukha avasasi, khukhumbukha khunyumba, nu khutunja imila ni njovele.

Alongelye khangi finu ngita, vanu vatane khwisemwa ni mali cha khuluta, mahusianu ka khatali na kalinu, avafijana khukhevela imila na maisha ka vangi. Aletile imifanu yeyihusu avapangwa yevibita khumujini na kuvanga amaisha tofauti ni mila chavene. Ikhitabu khisima khutikila pevali avanu yevitaka amatawa kavene na kuhola kakhisungu. Pevali avangi yevilemwa hata kuhika vone wahungile khwa khipangwa vikhityusa ngita sivakhimanyile.

Umuyandisi alongelwe kuhusu uvulamusi wevifanya avafiongesi wewihusu imali na maisha ketu. Umuyandisi alongelye isiasa nuvuongosi. Khulutila avafiongesi, alongelye ikhikundi shevikavana imali chapamwinga. Badalaya khusimalila imali icho, avene visindana ukhukavana. Umwinyawitali.

Khulutila ifesimo vya mukhitabu ikhi, umuyandisi aletile vufikililo vupya. Itanga avafijana yevahambulike ukhusala ikhipangwa ndyo viva vakhisasa. Kulutila ifesimo ifi, muyandisi itanga vanu yevitama khutali ni inyi ya vapangwa, vawese khufundisa avana na vadala/vakosi vavo imila. Khwakhukhitewe, yayitanga khutunja imila kwene fikono avanu vitama mu inyi yeyihanjikine.

1. Ngotola

Khunyumba kwetu khu mbwila, ndilutila ya khumilo,
 Khulufumbu ndidamila, khubita kwihonjokolo,
 Vone yivava injala, ya ndilya pamapokolo,
 Utulanji pamavala, amakuhu mubokolo,
 Yune ngotola ndivuya, khumlangali nyalafu.

Ndikhakekilwe khichisa, ndahambwe makonafili,
 Sitwahele khukanisa, twavangile molimoli,
 Ndisike ndipikanisa, me ndinya vana vavili,
 Haki de ndichovesa, meysisike yimwangeli,
 Yune ngotola ndivuya, khumlangali nyalafu.

Ndikhali ngita ndibofwe, amihu kanya makhichi,
 Ndavonike mbanga ndifwe, vone vidinda ulwichi,
 Muhacha akhanibafwe, ndilekhelwe vumang'achi,
 Akhatike mbanga ndifwe, ndilayicha nulumichi,
 Yune ngotola ndivuya, khumlangali nyalafu.

Iwa khunikukulyusa, ibulula ngita linu,
 Mavamba ndikhitonosa, mkati fivava finu,
 Atike ndikhamdesa, ilonda akeke khinu,
 Ndifwa ng'ing'ila khichisa, shandakhuchova kwa vanu,
 Yune ngotola ndivuya, khumlangali nyalafu.

Ifilyo fya khulokosa, mvikhila ndilekhelwe,
Khukhalanga sindiwesa, hata mafuta ndipelwe,
Khila khikono vu vusa, amasoli ichulilwe,
Ilonda khunikomosa, umyangu akhemelwe,
Yune ngotola ndivuya, khumlangali nyalafu.

Ndemyenyu mendisokwe, ndivuya sinda budile,
Yeilonda akhakekwe, na myangu akhakele,
Umunya ng'ani anokwe, abite akhilolele,
Atange mukove ukwe, pa mulaba ndinyilile,
Yune ngotola ndivuya, khumlangali nyalafu.

2. Inyi Yihele

Khatali pali na vanu, yevahochike patali,
 Vatengenise ifinu, bila khubita khusuli,
 Mbakhi miteku ya ng'anu, sufulila ni bakhuli,
 Avasehe yevahele, ni inyi vahele nayo.

Vatengenise mahukha, twilima mbakha twichokha,
 Vahongolike ni vyakha, fyetwikula mumadukha,
 Vavumbaka mbakhi sokha, yote ya shuma ni shakha,
 Avasehe yevahele, ni inyi vahele nayo.

Khuhuma pevahekile, tusike twikhing'ung'ula,
 Vangila pevilakile, ndyo vahekile ni mila,
 Imitwe yikokodele, khila khinu metwikula,
 Avasehe yevahele, ni inyi vahele nayo.

Vachengike ifisanji, fyefidumu nukhusemwa,
 Vabachulaka malanji, mahivi koti kifumwa,
 Nyumba chali cha malanji, ilihanu ndyo litimwa,
 Avasehe yevahele, ni inyi vahele nayo.

Ndyo chikhayichaki sulii, khudindula imilyangu,
 Metutake ifimuli, tulimbe ifyakhisungu,
 Tulekhe khulya sokholi, amambali na mayungu,
 Avasehe yevahele, ni inyi vahele nayo.

Vakhamwe vanu vala, khututanga valongove,
Vakhatumye uluhala, nekhe indeke tuhove,
Vabechiche inyakala, ukhutelekhela have,
Avasehe yevahele, ni inyi vahele nayo.

Tukhavangake vusasa, fya khatali twatakile,
Twilya fya khutulukusa, isoseji nu mchele,
Likhovokhovo nu vusa, ifyo have tuchokhile,
Avasehe yevahele, ni inyi vahele nayo.

Imyakha meyilutile, tuyiwene isekhema,
Avanu metufutale, amaleme mekidima,
Avangi vanyalukhwale, kwinyilanyila mtima,
Avasehe yevahele, ni inyi vahele nayo.

Shoshowa mesitwiwesa, tusike khwilumaluma,
Twilemwa khutengenesa, tubii khunyanyi nyama,
Khila khinu twihumusa, tupatile mukhusoma,
Avasehe yevahele, ni inyi vahele nayo.

3. Dinde Ulwichi

Mkoyo mnyalihukha,
 Siwe ndikhakhuyilikha,
 Vone pala wikomokha,
 Pewiva ukhandilikha,
 Ulekhe khuboyongokha,
 Avana vipipulikha,
 Nde nyina ndiahibikha,
 Ndiva ndisalaulikha
 Oso nde wipikhumbukha
 Pewahumile ni sokha,
 Ukhayichake pasikha,
 Pavukimbi wamahukha,
 Ndavele nu samwinukha,
 Nekhe unove ni shakha,
 Avanu vitawanyikha,
 Ndalemilwe ukhukhekha,
 Uve witova ni shakha,
 Ndifwa na khuchulubukha,
 Mkoyo ndakhunyilikha,
 Pewilonda khukulukha,
 Dindu lwichi ulahokha.

4. Mswamu Nyamalongo

Ndatike ndichengi nyumba, ndivumanyile khumyanda,
Mchovele umujomba, akhanipele itenda,
Siyo khutya ndikhikamba, ndichenga mitindo yonda,
Uyo de ndimumanyile, muswamve nyamalongo.

Wahekile ve mkosi, kwa mjomba wafikhile,
Ukhapulake vudesi, ni nyakala uhakale,
Utike alinde tasi, wilonda umchovele,
Uyo de ndimumanyile, mswamuve nyamalongo.

Hahika ndimumanyile, alakhuchanga benono,
Huma khadimi khasule, sikamelaka amino,
Khamemile amapele, ni sosolo khila pono,
Uyo de ndimumanyile, mswamuve nyamalongo.

Mswamuve nyamalongo, mama musa khukhilabu,
Pa nyumba yinya mlingo, khulya ya vene ya tabu,
Alemwaka imichango, maisha kali sulubu,
Uyo de ndimumanyile, mswamuve nyamalongo.

Ilelu meikhikimba, eti fundi mutalamu,
Shandakela khumuhomba, ahambwe tunya machimu,
Awechake mukhulemba, ahopake vuchihimu,
Uyo de ndimumanyile, mswamuve nyamalongo.

5. Suluvali Nyene

Pa sitendi ndifikhile, ndilinda ndiche nditolwe,
 Amayumba kanonile, mufoleni kachengilwe,
 Balabala chivakyele, khwa mumweya chicholilwe,
 Umwanuyu akekile, ndikhiwene khinya mwikhu.

Umswamu afikhile, mukali vali vavili,
 Mwene nu papa vayikhile, vanisindikhe mukali,
 Twakendile tuchikhile, upapa inyichi kali,
 Umwanuyu akekile, ndikhiwene khinya mwikhu.

Panyumba tukhafikhile, ishakhulya vaetile,
 Khushumba vanilakile, shang'ani ndikhayokile,
 Penapo shendachokile, itulu khwechahumile,
 Umwanuyu akekile, ndikhiwene khinya mwikhu.

Ukhatike ukekile, ave khwina mkhamwana,
 Ndilonda ndimuhungile, ukhamfihile kwina,
 Lichu lyangu ndimpele, indowa yenyu khunana,
 Umwanuyu akekile, ndikhiwene khinya mwikhu.

Makhusangye nuvukali, akhuyanushe vunofi,
 Khang'i sumuwene vuli, wivanga uvukolofi,
 Yayendesike ikali, akhakhuhungye vunofi,
 Umwanuyu akekile, ndikhiwene khinya mwikhu.

Ange hisho nde mawane, ma wilota ve mwanave,
Uyu ye tulongochine, muvili mekadakave,
Nu papayu vatekine, linganise hata yuve,
Umwanuyu akekile, ndikhiwene khinya mwikhu.

Shendifundisaka khina, upapuyu samanyile,
Nu mwalive twitekana, nda ndichanga unjovele,
Akhuchangile na khina, shekhikhite ukhevele,
Umwanuyu akekile, ndikhiwene khinya mwikhu.

Humbe ni nyumba ya mwene, ikali ni khila khinu,
Upye suluvale nyene, uli mudala va munu,
Shamwalelu ndikhiwene, Nguluvi tange lukhinu,
Umwanuyu akekile, ndikhiwene khinya mwikhu.

Mwalivangu mendiheka, hesimwake mkosivu,
Khwa vangi ulabitaka, heshimwaki ndowa njavu,
Tulilake aladaka, khumbukhake vahachavu,
Umwanuyu akekile, ndikhiwene khinya mwikhu.

6. Sandukha

Nyano umswamu vangu, mhume mendikongola,
 Mwatye ali khuvusangu, khibalula khumahala,
 Mwamuwene pamlungu, ahumile pakhusala,
 Ahekile ipihekha, akomwikhe musandukha.

Akhahekile khatali, apye mdimi mdekhe,
 Nu mlefu khwa patali, ukhukeka ayidikhe,
 Akomwikhe ne mtali, khumihu akhongolwikhe,
 Ahekile ipihekha, akomwikhe musandukha.

Atuleshe mkhamwana, nu mswamu pamkongo,
 Ahele iminamina, ilongwiche nu Lufingo,
 Amabumunda ka ngana, akhapindake ni nyengo,
 Ahekile ipihekha, akomwikhe musandukha.

Akhatuleshe ni sambu, tuvonekhe twivachila,
 Satuvonise vayembi, nde vipyupa khuvalola,
 Ilelu me pamfumbi, vuli tukhavachovela,
 Ahekile ipihekha, akomwikhe musandukha.

Hata kama siwichova, mbanga whichile utame,
 Ukhatuleshe vukhiva, linu lelu khumahame,
 Yaka twiyicha khuchuva, umwiwili ya tudome,
 Ahekile ipihekha, akomwikhe musandukha.

7. Khupakala

Sindipulikha vunofu, pangi sipika chifwele,
Simu yene mkhangafu, khuyakha mbakhu doodle,
Ilelu sina molofu, ndilonda ndikhuchovele,
Ikhilu meyifikhile, nditiniche mendivuya.

Beno mswamu mendiheka, lolechake lilungulu,
Vanya machumbi viyaka, shanda khubita khwihulu,
Khwa patali ndipulika, avanu vanya filulu,
Ikhilu meyifikhile, nditiniche mendivuya.

Ilichuva lisotile, mendibita muluvaka,
Yawivona ndihekile, utanake khwifuluka,
Umlaba kusikele, ve myangu wimalaka,
Ikhilu meyifikhile, nditiniche mendivuya.

Ndivuya khwavatengula, penapa ndilimsule,
Khasanake khupakala, imilyangu udindule,
Vone vakhakhutovela, umanyake yimwangele,
Ikhilu meyifikhile, nditiniche mendivuya.

Pakhidunda pa khukhuyo, udomekhake mikhongi,
Ikhideku sha mkoyo, shandatamila avangi,
Peyandihecha ulwayo, uve khadikhake pangi,
Ikhilu meyifikhile, nditiniche mendivuya.

Pamsingu pakhatile, khukhekha mendilemewa,
Ilileme limemile, makulu sikali sawa,
Mvili mekubelile, ndikhuleshe ilitawa,
Ikhilu meyifikhile, nditiniche mendivuya.

8. Matambiko

Taisoni iyingila, ali khumkongobaki,
 Mulivokho anya hula, ni khimfukhu sha kaki,
 Sanjikhu ali pivala, ni khikhombi nu msaki,
 Matambiko pakhidunda, panya nongwa pulikhanhye,

Matambiko wilave, pakhidunda panya nongwa,
 Yeniwi wibita yuve, lulukhela numtungwa,
 Vahachavu vakhayave, mpinde na ka machungwa,
 Matambiko pakhidunda, panya nongwa pulikhanhye.

Simbwe ali khuluvana, asabita akhabeche,
 Steriya itovi ngana, meamale akhayiche,
 Levunila nu Matina, nu Edita mwilongoche,
 Matambiko pakhidunda, panya nongwa pulikhanhye.

Levukadia iyicha, ndiseng'ile u Hatibu,
 Ulutilake pa bucha, imboka yilava tabu,
 Ulekhake khutinacha, khulutila pakhilabu,
 Matambiko pakhidunda, panya nongwa pulikhanhye.

Lutile pamlangali, valongovu khuvatola,
 Khemele u Danieli, hata ave khukhupula,
 Mlondake nu Hilali, akhatange khulamula,
 Matambiko pakhidunda, panya nongwa pulikhanhye.

Muyikhake khuvuduti, Esita nu Kabulyela,
 Mvakhemelake voti, mlutile khumapwela,
 Mkhafikhake khukati, kwa Hona Kkumasavula,
 Matambiko pakhidunda, panya nongwa pulikhanhye.

Mtane khuva vakhali, pemkhosye khuhongecha,
Mlolake u Hilali, alatova pemwipocha,
Atame nu Danieli, atange khuvakanicha,
Matambiko pakhidunda, panya nongwa pulikhanhye.

Mtamake pa suluhu, nyevote mtanganile,
Mlolanake amihu, vanya ng'ani shandakele,
Pemumalile suluhu, amajibu vavapele,
Matambiko pakhidunda, panya nongwa pulikhanhye.

9. Fideke Fyana

Vuli ngita wikanisa, upasemilwe panyumba,
 Ndivona ukhanihesa, pamihu shukhanihimba,
 Maswali kakhakhutesa, ilelu ndikhakhuhomba,
 Wahambwe fideke fyana, ilelu nave chiwene.

Ndatye nyumba yidimile, unange amakobili,
 Matofali ndichengele, na mabati ndibadili,
 Ililindi ndikimile, shumba tukone ni buli,
 Wahambwe fideke fyana, ilelu nave chiwene.

Ufikhile ukuwene, ukuyumba kwa khatali,
 Nu msalani kukwene, tangia wisomi sulii,
 Mujikhu chikoni mene, ilibati sipelili,
 Wahambwe fideke fyana, ilelu nave chiwene.

Wivucha ndakhitye khina, ihela chewatumile,
 Aka masaka ndivona, Iya khwanja meulipile,
 Wala situlakombana, mbakhi lideni umale,
 Wahambwe fideke fyana, ilelu nave chiwene.

Ufawilwe sekondali, panyumba pahanjikine,
 Toli tala ya chemuli, khwa vayinu ukhidane,
 Panyumba pana fimuli, ni mepu tuelewane,
 Wahambwe fideke fyana, ilelu nave chiwene

Ndikhakulike amanu, kewayachike khusule,
Shewatumilike mbinu, ukhahambwe ndeluvale,
Wanivembelike khunu, makobili ndikhupele,
Wahambwe fideke fyana, ilelu nave chiwene.

Isenga changu chihele, khu oksijeni cha sulii,
Ni asembo wadenyile, ndilipike molimoli,
Ndikuchiche machebele, ilideni lya samali,
Wahambwe fideke fyana, ilelu nave chiwene

Nayune mendivangile, me vubabwa shendivona,
Amasaka ulipile, ndiyachiche ikorona,
Linu yibidi umele, ndikhakule khuluvana,
Wahambwe fideke fyana, ilelu nave chiwene.

10. Nyumba Madinda

Mngananga ndemyenu, amakasi kifuluma,
 Nyanono ndikhola khunu, panyumba panya sekhema,
 Nda mwibeda panya khinu, khiyicha sishakhusima,
 Mtike nyumba madinda, ndemyenyu ndilemilwe.

Pene nyumba patikine, mwayuva akhanisala,
 Umyangu apepene, munyi khilu ichungula,
 Ndimchovye tulekhane, ahikile shandakela,
 Mtike nyumba madinda, ndemyenyu ndilemilwe.

Mwambwene pendakhofyaka, ali ngita asalichwe,
 Twalimanhyike injika, pamlaba ndahechichwe,
 Ali ngita malaika, khulongela mbakha vuchwe,
 Mtike nyumba madinda, ndemyenyu ndilemilwe.

Au vameleye mhacha, nyanono ndikhavavucha,
 Ndemyenyu ndikhihocha, ndilemwa ukhumbecha,
 Nyumba makoda imicha, nde ilonda nipuvacha,
 Mtike nyumba madinda, ndemyenyu ndilemilwe.

Ileta na vavayangu, ndili baho ndipilola,
 Vikona khitanda shangu, vihenya mbakha vimala,
 Avangi vaswamu vangu, mfuchi akhavapela,
 Mtike nyumba madinda, ndemyenyu ndilemilwe.

Ilelu aniseng'ile, khukhilabu khumakhuchu,
Ikhasi mevamalile, mevilongela amachu,
Uvukimbi ndikhakule, myangu kwilapa nechu,
Mtike nyumba madinda, ndemyenyu ndilemilwe.

Uvukimbi ndikulile, ndili munjila ndivuya,
Ilikoka limemile, kwileme finu fidaya,
Nditame ndikokolele, ndinyilile khwiyunguya,
Mtike nyumba madinda, ndemyenyu ndilemilwe.